



8. september 2023

UKA2023/52

Inatsisartut Suleriaasianni § 36 malillugu apeqquaqat aallaavigalugu oqallinnissamik imaattumik siunnersuuteqarpunga:

**Naammattunik piginnaasalinnillu sulisoqarluni suliffeqarfinnik angusaqarfiulluurtumik qanoq pilersitsinissatsinnik Inatsisartut isumaat pillugu apeqquaqat aallaavigalugu oqallinnissamik siunnersuut.**

(Inatsisartunut ilaasortaq Asii Chemnitz Narup, Inuit Ataqatigiit)

Nunatsinni suliffissaaleqisut aatsaat taamatut ikitsigaat. Illoqarfinni tamangajanni suliffissaaleqisoqanngingajappoq. Tamanna nutaarsiallatsiaasusaagaluarpoo, kisianni namminersorlutik inuussutissarsiortut pisortallu sulisoqarniarnerannut ajornartorsiutinngornikuuvoq piviusoq. Nunatsinnilu suliffeqarfiit naleqquttunik piginnaasalinnik sulisussarsinnaanngikkaangata nunatsinni tamani tunisassiorneq iluanaaruteqarnerlu annikillisarput. Pingaartumik aalisarnermi ilinniarsimangitsunik sulisussaaleqisoqartorujussuuvoq, sanaartornermilu ilaatigut sanasutut ilinniarsimasunik amigaateqartoqarpoq. Pisortat ingerlatsineranni sulit atualinngitsuni meeqqallu atuarfiini, isumaginnittoqarfimmi peqqinnissaqarfimmilu piginnaasalinnik sulisussaaleqisoqartorujussuuvoq. Aamma pisortat allaffiini atorfiit inuttassarsinisaat ajornakusoortorujussuugajuttarpoq. Unaminartut ilaatigut inuiaqatigiinni innuttaasut agguataarnerannik tunngaveqarput: Utoqqaat amerliartorput – tassa amerliartuinnartut suliunnaarlutik soraarinngortarput – inuusuttullu sulilersartut ikiliniikuullutik. Inuussutissarsiutit immikkoortuisa ilaanni, assersuutigalugu neriniartarfinni, pisiniarfinni, asaasuni aalisarnerullu ilaani, aaqqiissut tassaaleriartuinnarpoq ilaatigut Asiamit piginnaasalinnik sulisussarsiortarneq.<sup>1</sup>

Tamanna maannakkorpiaq siunissamilu ungasinnerusumi ajornartorsiutaavoq, taamaammat aaqqiissutissat suut Inatsisartut siunnersuutigisinnaaneraat apeqquaqat tunngavigalugu oqallinnissaq kissaatigaara. Naalakkersuisut unaminartoq aningaasaqarnikkut ingerlatsinermik 2023-mi nassuiaammi erseqqissarpaat suliffeqarnermillu aaqqiissusseqqinnissaq suliarineqartoq oqaatigalugu.

Apeqqutit uku sammillugit oqallinnissaq kissaatigaara:

- Suliffeqarnermik aaqqiissusseqqinnissaq aamma suliffissaqartitsineq pillugu periusissiat allat pillugit Naalakkersuisut sunik ilisimatitsissuteqarsinnaappat?
- Piffissami sivikitsuarsuararmi ungasinnerulaartumilu sulisussat amerlinissaanut Inatsisartut sunik siunnersuutissaqarpat?
- Nunanit allanit sulisussarsiortarneq pillugu Inatsisartut qanoq isumaqarpat – sulisut nunanit allaneersut piumasaqaatit suut eqqortissaneraat Inatsisartut isumaqarpat aamma inuussutissarsiutit immikkoortui tamarmik sulisunik nunanit allaneersunik sulisussarsiorsinnaassappat?
- Piffissami qaninnermi sulisussaqaarnissamik pisariaqartitsinerup iliuuseqarfiginissaa siunertaralugu assersuutigalugu aalisarnermik inuussutissarsiummi pisariillisaanissaq pillugu Inatsisartut sunik allanik siunnersuutissaqarpat?

Apeqqummik pingaaruteqarluinnartumik pitsaasumik piviusorsiorlumillu oqallinnissaq qilanaaralugu.

---

<sup>1</sup> Kisitsisit itisiliinerlu pillugit aningaasaqarnermik ingerlatsinermik 2023-mi nassuiaat innersuussutigaa.